

REGLUGERÐ FRAMKVÆMDASTJÓRNARINNAR (EB) nr. 1618/1999 **2001/EES/51/16**
frá 23. júlí 1999

um viðmiðanir við gæðamat á hagskýrslum um skipulag fyrirtækja(*)

FRAMKVÆMDASTJÓRN EVRÓPUBANDALAGANNA
HEFUR,

með hliðsjón af stofnsáttmála Evrópubandalagsins,

með hliðsjón af reglugerð ráðsins (EB, KBE) nr. 58/97 frá 20. desember 1996 varðandi hagskýrslur um skipulag fyrirtækja⁽¹⁾, eins og henni var síðast breytt með reglugerð (EB, KBE) nr. 410/98⁽²⁾, einkum vi-lið 12. gr.,

og að teknu tilliti til eftirfarandi:

- 1) Með reglugerð (EB, KBE) nr. 58/97 var settur sameiginlegur rammi um hagskýrslugerð bandalagsins um skipulag, starfsemi, samkeppnishæfni og afkomu fyrirtækja í bandalaginu.
- 2) Framkvæmdastjórnin skal leggja skýrslu fyrir Evrópuþingið og ráðið um þessar hagskýrslur, einkum um gæði þeirra og fyrirhöfn fyrirtækja.

3) Nauðsynlegt er að framkvæmdastjórnin ákvarði viðmiðanir við gæðamat á hagskýrslum um skipulag fyrirtækja.

4) Ráðstafanirnar, sem kveðið er á um í þessari reglugerð, eru í samræmi við álit hagskýrsluáætlunarnefndarinnar.

SAMÞYKKT REGLUGERÐ ÞESSA:

1. gr.

Viðmiðanirnar við gæðamatið sem um getur í 7. gr. reglugerðar (EB, KBE) nr. 58/97 eru tilgreindar í viðaukanum við þessa reglugerð.

2. gr.

Reglugerð þessi öðlast gildi á tuttugasta degi eftir að hún birtist í *Stjórnartíðindum Evrópubandalaganna*.

Reglugerð þessi er bindandi í heild sinni og gildir í öllum aðildarríkjunum án frekari lögfestingar.

Gjört í Brussel 23. júlí 1999.

Fyrir hönd framkvæmdastjórnarinnar,

Yves-Thibault DE SILGUY

framkvæmdastjóri.

(*) Þessi EB-gerð, sem birtist í Stjtið. EB L 192, 24.7.1998, bls. 11, var nefnd í ákvörðun sameiginlegu EES-nefndarinnar nr. 98/2000 frá 27. október 2000 um breytingu á XXI. viðauka (Hagskýrslugerð) við EES-samninginn. Sjá EES-viðbæti við Stjórnartíðindi Evrópubandalaganna nr. 2, 11.1.2001, bls. 15.

⁽¹⁾ Stjtið. EB L 14, 17.1.1997, bls. 1.

⁽²⁾ Stjtið. EB L 52, 21.2.1998, bls. 1.

VIÐAUKI

GÆÐAVÍSAR OG LYKILBREYTUR

1. þáttur

Markmið

Markmiðið með þessum viðauka er að setja sameiginlegan ramma, á vettvangi Evrópubandalagsins, um árlegt mat á gæðum hagskýrslna um skipulag fyrirtækja sem teknar eru saman innan ramma reglugerðar (EB) nr. 58/97 varðandi hagskýrslur um skipulag fyrirtækja.

2. þáttur

Umfang

1. Gefa skal skýrslu um þá gæðavísa og þær skýrslur, sem kveðið er á um hér á eftir, vegna allrar starfsemi sem um getur í 3. þætti 1. viðauka, í reglugerðinni um hagskýrslur um skipulag fyrirtækja, í samræmi við undanþáguna sem kveðið er á um í reglugerð framkvæmdastjórnarinnar (EB) nr. 2699/98 ⁽¹⁾.
2. Aðildarríki þarf ekki að gefa skýrslu um upplýsingarnar, sem mælt er fyrir um í þessum viðauka, að því er varðar þessa reglugerð, ef heildarfjárhæð virðisauka á þáttaverði í viðkomandi aðildarríki er að jafnaði lægri en 1% af heildartölu bandalagsins. Þetta viðmiðunarmark skal gilda fyrir allar starfsgreinar í Atvinnugreinaflokkun Evrópubandalagsins, 1. endursk., þar sem krafist er gæðavísa eða skýrslu.

3. þáttur

Fyrsta viðmiðunarár

Leggja skal fram þær upplýsingar, sem mælt er fyrir um í þessum viðauka, fyrir fyrsta viðmiðunarárið sem er almanaksárið 1997. Ef upplýsingar eru ekki tiltækar fyrir þetta fyrsta viðmiðunarár innan þess afhendingarfrests sem mælt er fyrir um í 2. mgr. 4. þáttar, gildir það viðmiðunarár sem næst er 1997 og upplýsingar eru tiltækar um.

4. þáttur

Afhending upplýsinga

1. Afhenda skal gæðavísana og skýrslurnar, sem mælt er fyrir um í viðaukanum, innan 24 mánaða frá lokum almanaksárs viðmiðunartímabilsins.

Unnt er að lengja afhendingartímabilið um þann frest sem framkvæmdastjórnin veitir með reglugerð (EB) nr. 2699/98 ef sá viðbótarfrestur varðar breytu sem gert er ráð fyrir í 5. þætti þessa viðauka.
2. Fyrsta afhending gæðavísa (1., 2., 3. og 4. liður í 5. þætti) og skýrslna (6. þáttur) skal vera fyrir lok desembermánaðar 1999.

5. þáttur

Gæðavísar: fráviksstuðull og brottfallshlutfall

Aðildarríki skulu greina frá upplýsingum um breytur, þrep og raðir, eins og tilgreint er hér á eftir, í samræmi við undanþágur sem kynni að vera gert ráð fyrir á viðmiðunarárinu.

Aðildarríki skal gera grein fyrir þeim heildarfráviksstuðli sem miðað er við, fyrir hverja röð, breytu og hvert þrep starfsemi sem kemur fram hér á eftir, í samræmi við efni könnunarinnar, brottfall, villur vegna rangrar flokkunar og úrtaksvillu ef þörf krefur.

Fráviksstuðull er hlutfall milli kvaðratrótar dreifistölu metils og meðalgildis.

1. Röð 1A (árlegar fyrirtækjahagskýrslur):

– sex breytur (11 11 0; 12 11 0; 12 15 0; 13 31 0; 15 11 0; 16 13 0),

– Atvinnugreinaflokkun Evrópubandalagsins, 1. endursk., þriggja tölustafa þrep (flokkar) eða endurflokkun starfsemi eins og kemur fram í 9. þætti 1. viðauka reglugerðarinnar um hagskýrslur um skipulag fyrirtækja.

⁽¹⁾ Stjótið. EB L 344, 18.12.1998, bls. 1.

2. Röð 1B (árlegar fyrirtækjahagskýrslur eftir stærðarflokki):

- _ þrjár breytur (11 11 0; 12 11 0; 12 15 0),
- _ Atvinnugreinaflokkun Evrópubandalagsins, 1. endursk., þriggja tölustafa þrep (flokkur) eða endurflokkun eins og fram kemur í 9. þætti 1. viðauka við reglugerðina um hagskýrslur um skipulag fyrirtækja og endurflokkanir stærðarflokka sem hér segir: 1-19; 20-249; 250-999; > 1000.

3. Röð 1C (árlegar svæðahagskýrslur):

- _ tvær breytur (11 21 0; 13 32 0),
- _ Atvinnugreinaflokkun Evrópubandalagsins, 1. endursk., tveggja tölustafa þrep (deildir) og Flokkun hagskýrslusvæða 2 (NUTS 2).

4. Brottfallseining

Aðildarríki skulu tilkynna brottfallshlutfall hagskýrslueiningar eftir Atvinnugreinaflokkun Evrópubandalagsins, 1. endursk., þriggja tölustafa þrepi eða endurflokkunum eins og kemur fram í 9. þætti 1. viðauka við reglugerðina um hagskýrslur um skipulag fyrirtækja.

5. Brottfallshlutfall liða

Aðildarríki skulu tilkynna um brottfallshlutfall liða eftir Atvinnugreinaflokkun Evrópubandalagsins, 1. endursk., þriggja tölustafa þrepi eða endurflokkunum, eins og kemur fram í 9. þætti 1. viðauka við reglugerðina um hagskýrslur um skipulag fyrirtækja, fyrir breytur: 12 11 0, 12 15 0, 13 31 0, 15 11 0, 16 13 0.

*6. þáttur***Sérstakar skýrslur**

Aðildarríkin skulu afhenda tvær sérstakar skýrslur eins og kemur fram hér á eftir.

1. Könnunaráætlun

Þessi skýrsla mun að minnsta kosti gefa vísbandingu um hvernig má nota heildarkönnun eða úrtak auk stjórnsýsluheimilda eða hagskýrslukannana fyrir hvern undirhóp fyrirtækja.

2. Aðalstarfsemi

Í þessari skýrslu kemur fram hvernig tekin er ákvörðun um aðalstarfsemina fyrir athugunareiningarnar sem nota skal til að taka saman niðurstöðurnar, sem sendar eru til Hagstofu Evrópubandalaganna (EUROSTAT), samkvæmt ákvæðum reglugerðarinnar um hagskýrslur um skipulag fyrirtækja. Einkum verða upplýsingar veittar um tíðni uppfærslna á aðalstarfsemi einingar, með það í huga hvort um sé að ræða hagskýrslukönnun eða stjórnsýsluheimild.

*7. þáttur***Dreifing Hagstofu Evrópubandalaganna á innlendum gögnum um gæði**

Ekki skal gefa út nein innlend gögn um gæði án samþykkis aðildarríkisins.

*8. þáttur***Aðlögunartímabil**

Upplýsingar sem koma fram í 5. lið 5. þætti eru valfrjálssar fyrstu tvö viðmiðunarárin, nánar til tekið 1997 og 1998.